

Na osnovu člana 47. stav 3. Zakona o drumskom prevozu Federacije Bosne i Hercegovine ("Službene novine Federacije BiH", broj 28/06), federalni ministar prometa i komunikacija donosi

## PRAVILNIK

### O USLOVIMA ZA DOBIJANJE I POSTUPAK IZDAVANJA DOZVOLA ZA JAVNI LINIJSKI PREVOZ TERETA KAO I NAČIN VOĐENJA REGISTRA IZDATIH DOZVOLA

#### Član 1.

Ovim Pravilnikom propisuju se uslovi za dobijanje i postupak izdavanja dozvola za javni linijski prevoz tereta, registar i vođenje registra izdatih dozvola.

#### I. Uslovi za dobijanje i postupak izdavanja dozvola za javni linijski prevoz tereta

#### Član 2.

Javni linijski prevoz tereta može vršiti prevoznik:

koji ima registrovanu djelatnost za obavljanje javnog prevoza,

posjeduje licencu za prevoznika i obrasce licence C za najmanje dva vozila,

ispunjava i druge uslove za obavljanje javnog prevoza tereta propisane Zakonom o drumskom prevozu (u daljnjem tekstu: Zakon), Zakonom o prevozu opasnih materija.

#### Član 3.

Prije obavljanja javnog linijskog prevoza tereta, prevoznik je dužan obezbijediti dozvolu za prevoz tereta, koji se obavlja po registrovanom redu vožnje, a koju izdaje Federalno ministarstvo prometa i komunikacija (u daljnjem tekstu: Ministarstvo).

Prevoznik je dužan cijenu usluga prevoza i druge uslove prevoza utvrditi na osnovu cjenovnika iz člana 44. stav 3. Zakona.

#### Član 4.

Ministarstvo putem javnog oglasa (u daljnjem tekstu: oglas) utvđuje uslove i način organizovanja linijskog prevoza tereta na određenim putnim pravcima.

Oglas iz stava 1. ovog člana može se objaviti na osnovu trenutnih prevoznih potreba, zahtjeva Udruženja prevoznika pri Privrednoj komori Federacije BiH ili zainteresovanog prevoznika.

#### Član 5.

Nakon isteka roka za podnošenja zahtjeva datog u oglasu, Komisija za odobravanje dozvola za javni linijski prevoz tereta (u daljnjem tekstu: Komisija), utvđuje validnost prispjele

dokumentacije i na osnovu iste sačinjava spisak prijavljenih prevoznika koji ispunjavaju uslove za izdavanje odobrenja za obavljanje linijskog prevoza tereta.

Komisiju iz stava 1. ovog člana rješenjem imenuje federalni ministar prometa i komunikacija (u daljnjem tekstu: ministar). Istim rješenjem određuju se zadaci Komisije.

Komisiji za obavljene poslove pripada novčana naknada, čiju visinu posebnim rješenjem utvrđuje ministar.

Naknada iz stava 3. ovog člana isplaćuje se iz novčanih sredstava uplaćenih za postupak dobijanja dozvole za javni linijski prevoz tereta.

#### Član 6.

Ako se na oglas prijavilo dva ili više prevoznika koji ispunjavaju uslove za vršenje linijskog prevoza tereta, Komisija organizuje sastanak sa prijavljenim prevoznicima radi dogovora o organizovanju linijskog prevoza tereta.

Ako se prevoznici dogovore, a dogovor je u skladu sa oglasom, Komisija će taj dogovor prihvatiti i rješenjem predložiti ministarstvu takav način organizovanja linijskog prevoza tereta.

Ukoliko se prevoznici ne uspiju dogovoriti, a Komisija po oglasu nema mogućnosti dati prioritet nekom prevozniku, Komisija će predložiti da se oglas, ili dio oglasa koji se odnosi na taj pravac, poništi.

Ako dođe do poništenja oglasa ministarstvo će ponovo raspisati oglas za uvođenje linijskog prevoza tereta na tom pravcu, na način utvrđen ovim Pravilnikom.

Ukoliko se na oglas prijavio samo jedan prevoznik koji ispunjava uslove, Komisija donosi rješenje kojim se predlaže da se prevozniku izda dozvola za obavljanje linijskog prevoza tereta po uslovima datim u oglasu.

#### Član 7.

Prilikom utvrđivanja validnosti prispjele dokumentacije, Komisija će cijeniti prispjelu dokumentaciju na osnovu kriterija iz oglasa i izvršiti rangiranje, ukoliko je to moguće, na osnovu kojeg može odlučivati u postupku, ukoliko se na oglas prijavi dva ili više prevoznika za isti pravac.

#### Član 8.

Na rješenje Komisije nezadovoljni prevoznik ima pravo uložiti žalbu Ministarstvu u roku od 15 dana od dana prijema rješenja Komisije.

Rješenje iz stava 1. ovog člana donijeto po žalbi je konačno.

#### Član 9.

Po okončanju postupka po oglasu, Komisija sačinjava izvještaj i dostavlja ga Ministarstvu.

Na osnovu izvještaja Komisije i rješenja po žalbama nezadovoljnih prevoznika, Ministarstvo izdaje dozvolu za obavljanje javnog linijskog prevoza tereta u formi rješenja.

## II. Registar i vođenje registra o izdatim dozvolama

### Član 10.

Ministarstvo vodi evidenciju o izdatim dozvolama u obliku registra.

Registar predstavlja spisak svih registrovanih redova vožnje u registracionom periodu kao i spisak redova vožnje koji su brisani u navedenom periodu.

Registar se vodi na posebnom obrascu u obliku kartoteke ili na računaru.

Obrazac registra iz stava 3. ovog člana dat je u prilogu ovog Pravilnika i čini njegov sastavni dio.

### Član 11.

Redovi vožnje razvrstani su u registru po prevoznicima, numeričkim redom po kojem su i registrovani.

### Član 12.

Upis podataka u registar obavlja Ministarstvo.

Unos podataka u registar obavlja se na računaru, a nakon izvršenog unosa podataka registar se mora odštampati, potpisati i ovjeriti od strane ovlaštene osobe.

Podaci upisani u registar ne smiju se brisati niti precrtavati.

### Član 13.

Registar izdatih dozvola za javni linijski prevoz tereta je javan.

### Član 14.

Registracioni period važenja redova vožnje za obavljanje linijskog prevoza tereta je pet godina.

Prevoznik može podnijeti zahtjev za produženje važenja reda vožnje za naredni registracioni period 30 dana prije isteka važenja reda vožnje za obavljanje javnog linijskog prevoza tereta.

## III. Završne odredbe

### Član 15.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

---

Broj 01/6-27-1073-1/07  
3. septembra 2007. godine  
Sarajevo

---

Ministar  
Nail Šećkanović, s. r